


L'UNDA DA CHALIRA I



En pliras regiuns regia in grond privel per incendis.

GRAFICA RTR

Sitgira – scumond absolut da far feu en las valladas dal sid

Cun las temperaturas autas e la chalira da stad en il Grischun s'augmenta er il privel per incendis e cuntanscha en las Valladas dal sid perfin il stgalim dal scumond absolut (nair). En il Mesauca, la Bregaglia ed il Puschlav èsi absolutamain scumandà da far feu en il liber. Er far feu en fuainas installadas fix n'è betg pli lubi. Tenor l'Uffizi da guaud e privels da natira dal Grischun regia il pli grond privel d'incendis da guaud.

En grondas parts da la Surselva, en parts dal Grischun Central e la regiun da Cuir, vala entant er in grond privel. En questas regiuns èsi sulettamain lubi da grillar en fuainas existentas, sch'ellas èn lubidas da las autoritads. Senza indicaziun da las autoritads localas ch'igl è explicitamain lubi da duvrar la fuaina na dastga betg vegnir fatg feu. Er en il chantun vischin, il Tessin, vala in scumond absolut da far feu en il liber.

En il Partenz, l'Engiadina Bassa u er en la regiun da Savognin e Spleia vala in privel considerabel. Sulettamain en la regiun da Claustra e Tavau sco er en l'Engiadina'Ota è il privel d'incendis anc sin il stgalim moderà. (rtr/fmr)

L'UNDA DA CHALIRA II

L'onda da chalira è arrivada en Svizra

L'onda da chalira en l'Europa ha er cuntanschì la Svizra. A partir da gliendisdis mezdì vala per la regiun da Basilea e per la Svizra franzosa il stgalim d'avertiment «considerabel». Per il Tessin vala quel gia dapi gievgia. Tenor SRF Meteo èsi da quintar quest'emna per part cun fin a 37 grads. En il decurs da l'emna vegn l'aria alura adina pli umida ed il privel d'urizis vegn pli grond. Era las notgs restan chaudas. Quant ditg che las chaliras cuzzan, n'è betg cler il mument. Tenor SRF Meteo èsi pussaivel che las temperaturas sa sbassan sin la fin d'emna. La Confederaziun recumonda da sa proteger da la chalira, da tegnair frestg corp ed abitaziun e d'evitar sforzs corporals. Auters tips cunter la chalira: baiver bier aua, na betg ir da mezdi en il sulegl, sa schurmegiar dal sulegl per exempel cun crema da sulegl, chapitscha ubain sulegliers Per firmas ch'han persunas che ston lavar giuador recumonda la Suva, da spustar lavurs grevas sin la damaun baud, da metter a disposiziun avunda aua e crema da sulegl per ils collavurats e da procurar per sumbriva per ch'els possian far pausas. En vastas parts da la Svizra vala ultra da quai in privel d'incendis da guaud augmentà. (rtr/fmr)

«I va per vita e mort»

L'opera en il chastè da Haldenstein festivescha sia 10avla producziun. La Filarmonia da chombra dal Grischun envida ad ovg producziuns da l'opera «Il trovatore» da Giuseppe Verdi. Las producziuns han lieu davent dals 3 en fin als 27 d'avust 2022. Mardi a mezdi han ils organisaturs infurmà las medias davart il program d'opera che porta trais novaziuns en l'opera dal chastè.

MARTIN GABRIEL/FMR

Tschintg onns èn passads dapi la davosa opera en il chastè da Haldenstein. La Filarmonia da chombra dal Grischun haja nizzegià la pausa dal coronavirus per preparar ina producziun giubilara cun trais midadas en il concept. Quai ha la presidenta da l'Uniu Filarmonia da chombra, *Jacqueline Giger Cahannes*, ditg en ses bainvegns en la curt dal chastè. «L'emprima novaziun è che nus essan betg pli dependents dal Teater da la citad da Cuir, sch'i plova. L'orchestra che na po betg sunar en la plievgia è ussa sut tetg en il local construi sut la tribuna.» Plinavant han ins reservà per mintgina da las ovg producziuns ina data da reserva. In novum è er che la vischnanca burgaisa da Cuir ha pussibilità da trasmetter la premiera da l'opera «Il trovatore» sco «Public Viewing» a Cuir sin il Kornplatz.

Giuseppe Verdi per la terza giada a Haldenstein

Philippe Bach è il dirigent da la Filarmonia da chombra dal Grischun ed el è responsabel per la part musicala dad «Il trovatore». Per el saja quai adina stà in grond siemi da pudair diriger ina giada «Il trovatore». «En pauc dis sai jau co ei vegn a tunar e co che l'acustica è qua en il chastè», ha Bach ditg. I dettia trais operas da Verdi che sajan fitg pretensiusas: «Rigoletto», «La Traviata» è «Il trovatore». «A la fin d'avust pudain nus constatar, che tuttas trais operas da questa trilogia da Verdi èn vegnidas dadas a Haldenstein. Per «Il trovatore» avain nus per l'emprima giada engaschà sulettamain chantadurs e chantadurs pli vegls e cun experienscha en la musica da Verdi», ha Philippe Bach ditg a la FMR, «i dovra ina tscherta forza da chantar rollas cun chor ed orchestra, sco per exempel quella da la Azucena u dal Manrico.»

In cumissari dal Tatort fa reschia

La Filarmonia da chombra dal Grischun ha pudì gudagnar l'enconuscent reschissur ed actur svizzer *Andrea Zogg* per la reschia e per l'inscenzaziun. Zogg ha er gia fatg reschia en producziuns da l'Opera Viva a Sursai. Enconuscent è el vegni tranter auter sco cumissari dal Tatort. «Il public da l'opera dal chastè dastga sa legrar quest onn sin ina opera cun impressiuns che sveglian gronds sentiments, sin ina gronda istorgia sco er sin in grondius ensemble», ha Andrea Zogg ditg, «l'amur, l'odi, la dependenza e la vendetga vegnan a laschar tremblar ils mirs dal chastè da Haldenstein.» En tut sajan 100 persunas involvidas en l'opera «Il trovatore». Andrea Zogg ha plinavant tradi, che questa producziun en il chastè da Haldenstein saja ina gronda sfida per el persunalmain: «Igl è insatge spezial da far mes job en la patria. Qua



Presidi, direzioni musicala e reschia: da san: Il reschissur *Andrea Zogg*, la presidenta da l'Uniu, *Jacqueline Giger Cahannes* ed il responsabel per la musica, *Philippe Bach*.

FOTO MARTIN GABRIEL

è la controlla dals collegas pli gronda. Era cun in tschert num sco actur e reschissur vegn mia prestaziun a vegnir evaluada bain.»

Il trovatore en ils onns 1960

L'inscenzaziun da l'opera da Verdi en il chastè da Haldenstein na lavura betg directamain cun ils maletgs da l'istorgia originala dal 14avel tschientaner. Andrea Zogg ha declarà, ch'el haja dentant tschertgà per l'istorgia «Il trovatore» in cosmos che vegnia fitg datiers a l'istorgia originala. «Anc avant in onn pensava jau ch'i vegnia ad esser difficil per il public da chapir l'istorgia originala fitg crudavla dal 14avel tschientaner. Ils schabets en l'Ucraina mussan dentant che l'Europa civilisada è fitg datiers al temp medieval: Citads bombardadas e baras che giaschan sin las vias, discurren ina lingua fitg clera.» L'istorgia dal trovatore en il chastè da Haldenstein gioga en ils onns 1960 en in ospital. «Actas e saung èn ils elements principals. Ma nagina tema» ha Andrea Zogg ditg: «Jau n'hai betg fatg or dal cont Luna in Vladimir Putin ed or dal Manrico na datti nagin Volodymyr Selenskyj». En l'istorgia a Haldenstein dettia scenas davent da la staziun d'uffants pitschens en fin a la patologia, ha Zogg raquintà. «I va per vita e mort en il ver senn dal pled.»

«L'odi, la dependenza e la vendetga vegnan a laschar tremblar ils mirs dal chastè da Haldenstein.»

Andrea Zogg, reschissur da l'opera en il chastè da Haldenstein

CAMPIONADIS MUNDIALS D'ATLETICA LEVA

Excellent prestaziun da l'atleta grischuna Annik Kälin

La premiera al campionadi mundial è gartegiada ad Annik Kälin. L'atleta da Grisch vegn 6avla en il heptatlon. Cun 6464 puncts meglierescha ella er ses agen record svizzer per 66 puncts.

RTR/FMR

I saja grondius ch'ella haja pudì sa participar ed igl haja fatg grond plaschair dad ir a la partenza davant uschè in culissa gigantica el stadion a Eugene en ils Stadis Unids, uschia *Annik Kälin* envers RTR. E sin quella tribuna mundiala ha la heptatleta da 22 onns briglià ils ultims dis. La premiera al campionadi mundial d'atletica leva cun l'elita è gartegiada tras a tras.

En pliras da las 7 disciplinas ha ella realisà u è stada datiers da records persunals.


Avant l'ultima disciplina, ils 800 meters curren, era Annik Kälin perfin sin il 5avel plaz intermediar. Malgrà ch'ella è currida ils 800 m uschè svelto sco nagin'otra heptatleta svizra avant, mancan a la fin 95 puncts sin quest 5avel plaz.

Gia suenter l'emprim di e las emprimas quatter da las total set disciplinas dal heptatlon era ella sin posiziun ovg, aveva recaltgà 3754 puncts. Quai eran 38 puncts dapli che tar ses record svizzer che Annik Kälin ha realisà questa primavaira al meeting a Grosseto. Quai gist tar ses

comeback suenter ina blessura pli lunga vi dal dies.

Annik Kälin da Grisch ha mussà ils ultims mais ch'ella è en furma. L'avrigl tar il meeting a Grosseto ha la giuvna da 22 onns persvas cun in nov record svizzer da 6398 puncts. Tant pli che sia furma constat e ses dies, ch'ha adina puspè mudregià ella, tegna. Uschia era ella 100% pronta per attatgar.

Per il atlet grischun *William Reais* è il campionadi mundial a fin suenter la cursa da qualificaziun sur ils 200 meters.



Annik Kälin.

FOTO KEYSTONE / WU XIAOLING